



DEMOKRAATIT

UPA 2026/142
12/5-2026
Hans Erik Enoksen

Nunami aalisakkerivinni innaallagissamut, imermullu akikillileruteqartitseriaatsip atuuttup aallarnisaasunut, suliffeqarfinnullu mikinerusunut atuutsilersinneqarneratigut aningaasatigut, allaffissornikkullu kingunissaanik erseqqissaasumik nalunaarusiornissaannik, Naalackersuisut peqquneqarnissaannik Inatsisartut aalajangiiffigisassaattut siunnersuut. Nassuiaat aningaasalersueriaatsinik, Inatsisartullu aalajangiinissamut tunngavissaannik ataatsimoortumik imaqassaaq. Nassuiaat kingusinnerpaamik 1. januar 2027-mi Inatsisartunut agguanneqassaaq. (Inatsisartunut ilaasortaq Napaartoq Isak Petrussen, Demokraatit) (Siullermeerineq)

Demokraatit Inatsisartunut ilaasortaataata Napaartoq Isak Petrussenip siunnersuutaanut uunga pitsaasumut qujanaq.

Inuiaqatigiit nukittuut, piujuartussallu nikittuunik inuussutissarsiortoqartariaqarput. Inuit suliniuteqarnissaminut, suliffeqarfimmik pilersitsinissaminut, isummanillu nutaanik ineriartortitsinissaminut sapiutsinnagit sinaakkutinik pilersitsinissarput Demokraatinut tunngaviulluinnarpoq. Aallarnisaaneq ataasiakkaanut periarfissaannaangilaq. Suliffeqarfinnik amerlanerusunik, aningaasaqarnermik qajannaannerusumik, isertitaqarfissanillu amerlanerusunik pilersitsissagutta inuiaqatigiinni tamanut pisariaqarpoq.

Inuussutissarsiorfiit ilisimariikkagut kisiisa naatsorsuutigisinnaangilagut. Inuussutissarsiutinik nutaanik ineriartortitsineq eqeersimaartumik tapersersortariaqarparput, nutaanillu misileerusuttunut pitsaannerusunik atugassaqartitsilluta. Taamaaliussagaanni sapiissuseqartariaqarpoq, kisiannili aamma politikikkut pitsaasunik eqqortunik sinaakkuteqartitsisariaqarluta. Tunisassiorneq, ineriartortitsineq imaluunniit pilersitsineq akisuallaarsimappat, taakkua piviusunngornaviangillat. Tamanna pillugu siuariartortitsinissamut, ineriartortitsinissamullu akimmiffiit isornartorsiuusumik isiginiassallugit akisussaaffigaarput.

Nukissiuutinut aningaasartuutit aallarnisaasorpasuit, suliffeqarfiillu mikinerusut unammillernartittagaasa ilaagaat. Innaallagiq, imerlu akisuppata isumassarsiap piviusunngortinneqarnissaanut imaluunniit isumassarsiaaginnarnissaanut aalajangiisuusinnaapput. Pingaartumik suliffinnik, najukkamilu aningaasatigut naleqalersitsinermut tapersiinnaagaluanit tunisassiornerup, piareersaanerup, najukkamilu suliniutit iluini.

Tamanna pillugu siunnersuut manna pingaarteqarlunilu piffissaq eqqorpaa. Ajornartorsiuativimmik aallaaveqarpoq, aalajangiinissarpullu sioqqullugu aalajangiinissami tunngavissaqarluarnissarput siunnerfigalugu. Naalackersuisut nassuiaasioqqunerisigut aningaasatigut, allaffissornikkullu kingunissaasa,



anigaasalersuinissami periarfissaasinnaasut, siuariartortitsinissamullu aamma suliffissanut naatsorsuutigisamik sunniutissaasa ersarissarnissaat qulakkiissavarput.

Tassa inuussutissarsiutit pillugit akisussaassusilimmik politikki taamatorpiaq ingerlanneqartariaqarpoq. Angusaqarluarniassaagut, kisianni aamma piviusorsiussaagut. Siunissamut anigaasaliinissarput meriserissanngilarput, tamannali paasissutissanik tunngavilimmik pissalluni.

Aallarnisaasunut, suliffeqarfinnullu mikinerusunut atugassarititaasunut sinaakkusiussanik pitsaanagerusunik pilersitsinissatsinnut qanoq siunnerfilimmik sulisinnaanissatsinnut, ilutigisaanillu tunngaveqarluartumik aalajangiisoqarnissaata qulakkeerneqarnissaanut siunnersuut manna assersuutissaqqippoq.

Taamatut oqaaseqarlunga siunnersuut Inuussutissarsiornermut Aatsitassanullu Ataatsimiititaliamit nangillugu oqaluuserineqarnissaanut innersuussutigaarput.